


Pesilat dijerat dua cinta

Berita Minggu, 28 July 1996, Page 8

 Article also available on Microfilm Reel NL20766

Printer-Friendly Page

Pesilat dijerat dua cinta

Biar golf lumayan, silat tetap jadi pilihan

PENTAS HIDUP

JUARA silat dunia, Sheik Alau'ddin Yacoob Maricar, pernah terjerat dalam dua cinta — silat dan golf. Soalnya ialah sama ada beliau perlu tumpukan perhatian pada silat, yang telah mengharumkan namanya, atau selaku pemain golf profesional, yang juga boleh memberikan ganjaran setimpal.

Tetapi, cinta Sheik pada seni silat lebih mendalam lagi dan menjadikan golf sebagai kegiatan riadah hujung minggu. Sheik, 29 tahun, telah mengharumkan seni silat tempatan di peringkat dunia apabila beliau menggondol dua pingat emas dalam pertandingan kejuaraan dunia. Beliau juga telah memenangi juara silat kebangsaan sebanyak 11 kali dan menggondol pingat emas Sukan SEA dua kali.

Hujung tahun ini, olahragawan berkulit hitam manis serta bertubuh sasa setinggi 1.87 meter itu perlu mempertahankan kejuaraan dunianya. Tahun depan pula, Sheik perlu mempertahankan kejuaraan Sukan SEA dan dalam 1998, Sukan Komanwel.

Bagaimana pula juara berketurunan Arab dan India ini boleh terlibat dalam silat?

Sambil tertawa, Sheik berkata: "Memang pada mulanya anggota keluarga saya anggapnya terlalu asing, tidak seperti hoki atau kriket. Tetapi lama-kelamaan, setelah saya mengukir nama, mereka bertukar pandangan dan kini menjadi antara penyokong setia saya."

Sheik, yang pernah bercita-cita mengikuti jejak pemain bolasepak terkenal seperti Dollah Kassim, Samad Alapitchay dan Quah Kim Song, menyambung cerita:

"Saya dan beberapa rakan dari Sekolah Menengah Telok Kurau kena *trick* dalam 1982. Kami diberitahu agar bertemu di Masjid Abdul Aleem Siddique, Lorong K, Telok Kurau, untuk menubuhkan pasukan bolasepak. Rupa-rupanya kami kena heret ikuti kelas agama!"

Bagaimanapun, katanya, selain daripada mengikuti kelas agama, mereka juga dipelawa mengikuti latihan seni silat sebagai riadah setiap malam Minggu.

Bermulalah cintanya pada seni silat di bawah bimbingan Encik Abdul Shukur Rais, guru pencak silat Persaudaraan

Panca Sakti.

**Dalam 1984,
Sheik dipilih selaku
penolong pelatih.**

**Dalam 1985,
mulalah beliau
bertarung dalam
pertandingan
peringkat nasional
bagi olahraga dan
seni dan seterusnya
mengukir nama
sebagai pesilat
handalan.**

**Untuk mendalami
ilmu persilatannya,
beliau telah berguru
di Jawa.**

**Selain daripada
latihan, Sheik
mengumpul koleksi
video pertahanan diri
antarabangsa seperti
karate, taekwondo
dan gongfu shaolin.**

**“Melalui video,
saya dapat meniru
contoh daripada
adegan seperti seni
silat dalam filem *Si
Pifung* lakonan Dicky
Zulkarnaen. Saya
juga meminati Bruce
Lee dan Jean Claude
Van Damme,” kata
pesilat yang pernah**

ditawar menjadi pelakon seperti bintang pujaannya itu.

Sheik juga gemar mengumpul senjata seperti keris, kijang dari Bandung, parang, trisula dari Jawa, nanchaku dari Jepun dan sabit.

Menyentuh tentang keluarganya, Sheik berkata beliau kali pertama menemui isterinya, Cik Sa'adiyah Sanuse, 31 tahun, dalam 1991.

"Kami bertemu di kelab riadah HDB dalam 1991 ketika bertugas sebagai penyelaras dan sering dibantu Sa'adiyah selaku pelatih aerobik sambilan. Setiap kali dia bantu, saya berjanji akan beri upah belanja makan di restoran McDonald's. Semakin hari saya pun tertarik hati kepadanya."

Dalam 1992, mereka ke jinjang pelamin dan kini dikurniakan tiga cahaya mata — Nur Shafiqah, 3½ tahun, Sheik Ashiddiq, 2 tahun, dan Sheik Firdaus, 4 bulan.

Cik Sa'adiyah, yang bertugas sebagai *draughtswoman* kanan di sebuah syarikat arkitek tempatan, pula berkata: "Sheik peramah, suka bergurau dan penyayang orangnya."

Untuk menambat hati suaminya, Cik Sa'adiyah biasanya, pada hujung minggu, menghidangkan laksa atau asam pedas kepala ikan yang menjadi kegemaran Sheik.

Sheik, yang kini menetap di flat lima bilik HDB di Bishan dan merancang berpindah ke kondominium eksekutif, masih bertugas di kelab riadah tersebut.

Pasangan itu juga berkongsi hobi yang sama: golf.

Kembali kepada dua cintanya itu, Sheik berkata dengan handikap 18, beliau telah menarik perhatian beberapa pemain tempatan yang mencadangkan beliau tinggalkan arena silat kerana golf profesional boleh memberi ganjaran setimpal. (Handikap tanda kemahiran pemain. Handikap yang kurang menunjukkan pemain lebih mahir).

Namun, juara silat itu berharap meraih Anugerah Olahragawan negara di samping menubuhkan Akademi Silat Sheik Alau'ddin pada suatu hari kelak.

CEBISAN:

Kegemaran:

Suka orang yang peramah
serta bersopan dan jujur.

Tidak suka:

Orang yang sombong,
bongkak.

Pakalan:

Kasual tetapi rapi

Warna:

Biru

Film:

Blood Sport lakonan Jean
Claude Van Damme

Pemain golf:

Nick Faldo

Melancong:

Paris

Pedoman hidup:

Berpegang pada nasihat ibu
"bila cakap berhati-hati dan
jangan menyinggung
perasaan orang lain, jangan
riak dan takabur dan selalu
menjaga kesihatan".



PIONEER

The Art of Entertainment

Juara dunia: Sheik telah mengharumkan seni silat tempatan di peringkat dunia.





Hanya sebagai riadah: Sheik mempunyai handikap 18 dalam golf.